


C40
4514
45



C40-444

了翁上座請大猷及有
家書置武州紫雲山
我微笑塔院廡府中永
為...
當山三世鐵牛機謹誌



B 64853

無量義經序

蕭齊荊州隱士劉虬作

無量義經者取其無相一灑廣生眾教含義不貲故
曰無量夫三界羣生隨業而轉一極正覺任機而通
流轉起滅者必在苦而希樂此叩聖之感也順通示
現者亦施悲而用慈即救世之應也根異教殊其階
成七先為波利等說五戒所謂人天善根一也次為
拘隣等轉四諦所謂授聲聞乘二也次為中根演十
二因緣所謂授緣覺乘三也次為上根舉六波羅蜜
所謂授以大乘四也眾教宣融羣疑須導次說無量



經

無量義經序

一

五

義經既稱得道差品復云未顯真實使發求實之冥
機用開一極之由緒五也故法華接唱顯一除三順
彼求實之心去此施權之名六也雖權開而實現猶
掩常住之正義在雙樹而臨崖乃暢我淨之玄音七
也過此以往法門雖多撮其大歸數盡於此亦由衆
聲不出五音之表百氏竝在六家之內其無量義經
雖法華首戴其目而中夏未覩其說每臨講肆未嘗
不廢談而歎想見斯文忽有武當山比丘慧表生自
羌胄僞帝姚略從子國破之日爲晉軍何澹之所得
數歲聰黠澹之字曰螟蛉養爲假子俄放出家便勤

苦求道南北遊尋不擇夷險以齊建元三年復訪奇
搜祕遠至嶺南於廣州朝廷寺遇中天竺沙門曇摩
伽陀耶舍手能隸書口解齊言欲傳此經未知所授
表便殷勤致請心形俱至淹歷旬朔僅得一本仍還
嶠北齋入武當以今永明三年九月十八日頂戴出
山見校弘通奉覲真文欣敬兼誠詠歌不足手舞莫
宣輒虔訪宿解抽刷庸思謹立序注云自極教應世
與俗而差神道救物稱感成異玄圃已東號曰太一
屬賓以西字爲正學東國明殃慶於百年西域辯休
咎於三世希無之與修空其揆一也有欲於無者既

無得無之分施心於空者豈有入空之照而講求釋
教者或謂會理可漸或謂入空必頓請試言之以筌
幽寄立漸者以萬事之成莫不有漸堅冰基於履霜
九仞成於累土學人之入空也雖未圓符譬如斬木
去寸無寸去尺無尺三空稍登寧非漸耶立頓者以
希善之功莫過觀法性法性從緣非有非無忘慮於
非有非無理照斯一者乃曰解空存心於非有非無
境智猶二者未免於有有中伏結非無日損之驗空
上論心未有入理之効而言納羅漢於一聽判無生
於終朝是接誘之言非稱實之說妙得非漸理固必

然既二談分路兩意爭途一去一取莫之或正尋得
旨之匠起自支安支公之論無生以七住爲道慧陰
足十住則羣方與能在迹斯異語照則一安公之辯
異觀三乘者始簣之日稱定慧者終成之實錄此謂
始求可隨根而三入解則其慧不二譬喻亦云大難
既夷乃無有三險路既息其化卽亡此則名一爲三
非有三悟明矣生公云道品可以泥洹非羅漢之名
六度可以至佛非樹王之謂斬木之喻木存故尺寸
可漸無生之證生盡故其照必頓案三乘名教皆以
生盡照息去有入空以此爲道不得取像於形器也

今無量義亦以無相爲本若所證實異豈曰無相若
入照必同寧曰有漸非漸而云漸密筌之虛教耳如
來亦云空拳誑小兒以此度衆生微文接麤漸說或
允忘象得意頓義爲長聊舉大較談者擇焉

無量義經

蕭齊天竺沙門曇摩伽陀耶舍譯

德行品第一

如是我聞一時佛住王舍城耆闍崛山中與大比丘
衆萬二千人俱菩薩摩訶薩八萬人天龍夜叉乾闥
婆阿脩羅迦樓羅緊那羅摩睺羅伽諸比丘比丘尼
及優婆塞優婆夷俱大轉輪王小轉輪王金輪銀輪
諸輪之王國王王子國臣國民國士國女國大長者
各與眷屬百千萬數而自圍繞來詣佛所頭面禮足
繞百千帀燒香散華種種供養供養佛已退一面坐

其菩薩名曰文殊師利法王子大威德藏法王子無
憂藏法王子大辯藏法王子彌勒菩薩導首菩薩藥
王菩薩藥上菩薩華幢菩薩華光菩薩陀羅尼自在
王菩薩觀世音菩薩大勢至菩薩常精進菩薩寶印
手菩薩寶積菩薩寶杖菩薩越三界菩薩毗摩颯羅
菩薩香象菩薩大香象菩薩師子吼王菩薩師子遊
戲世菩薩師子奮迅菩薩師子精進菩薩勇銳力菩
薩師子威猛伏菩薩莊嚴菩薩大莊嚴菩薩如是等
菩薩摩訶薩八萬人俱是諸菩薩莫不皆是法身大
士戒定慧解脫解脫知見之所成就其心禪寂常在

三昧恬安擔怕無爲無欲顛倒亂想不復得入靜寂
清澄志玄虛冥守志不動億百千劫無量法門悉現
在前得大智慧通達諸法曉了分別性相真實有無
長短明現顯白又善能知諸根性欲以陀羅尼無闕
辯才諸佛轉法輪隨順能轉微滴先墮以淹欲塵開
涅槃門扇解脫風除世惱熱致法清涼次降甚深十
二因緣用灑無明老病死等猛盛熾然苦聚日光爾
乃洪注無上大乘潤漬衆生諸有善根布善種子徧
功德田普令一切發菩提萌智慧日月方便時節扶
踈增長大乘事業令衆疾成阿耨多羅三藐三菩提

常住快樂微妙真實無量大悲救苦眾生是諸眾生
真善知識是諸眾生大良福田是諸眾生不請之師
是諸眾生安隱樂處救護處大依止處處爲衆
作大良導導師大導師能爲生盲而作眼目聾瞶啞
者作耳鼻舌諸根毀缺能令具足顛狂荒亂作大正
念船師大船師運載羣生度生死河置涅槃岸醫王
大醫王分別病相曉了藥性隨病授藥令衆樂服調
御大調御無諸放逸行猶如象馬師能調無不調師
子勇猛威伏衆獸難可沮壞遊戲菩薩諸波羅蜜於
如來地堅固不動安住願力廣淨佛國不久得成阿

耨多羅三藐三菩提是諸菩薩摩訶薩皆有如斯不
思議德其比丘名曰大智舍利弗神通目捷連慧命
須菩提摩訶迦旃延彌多羅尼子富樓那阿若憍陳
如等天眼阿那律持律優波離侍者阿難佛子羅雲
優波難陀離婆多劫賓那薄拘羅阿周陀莎伽陀頭
陀大迦葉優樓頻螺迦葉伽耶迦葉那提迦葉等如
是比丘萬二千人皆阿羅漢盡諸結漏無復縛著真
正解脫爾時大莊嚴菩薩摩訶薩徧觀衆座各定意
已與衆中八萬菩薩摩訶薩俱從座而起來詣佛所
頭面禮足繞百千匝燒散天華天香天衣天瓔珞天

無價寶從上空旋轉來下四面雲集而獻於佛天
廚天鉢器天百味充滿盈溢見色聞香自然飽足天
幢天幡天軒蓋天妙樂具處處安置作天妓樂娛樂
於佛卽前胡跪合掌一心俱共同聲說偈讚言

大哉大悟大聖主

無垢無染無所著

天人象馬調御師

道風德香熏一切

智恬情泊慮凝靜

意滅識亡心亦寂

永斷夢妄想想念

無復諸大陰界入

其身非有亦非無

非因非緣非自他

非方非圓非短長

非出非沒非生滅

非造非起非爲作

非坐非臥非行住

非動非轉非閑靜

非進非退非安危

非是非非非得失

非彼非此非去來

非青非黃非赤白

非紅非紫種種色

戒定慧解知見生

三明六通道品發

慈悲十力無畏起

衆生善業因緣出

示爲丈六紫金輝

方整閃耀甚明徹

毫相月旋項日光

旋髮紺青頂肉髻

淨眼明鏡上下眴

眉睫紺舒方口頰

脣舌赤好若丹果

白齒四十猶珂雪

額廣鼻脩面門開
手足柔輒具千輻
臂修肘長指直纖
踝膝不現陰馬藏
表裏映徹淨無垢
如是等相三十二
而實無相非相色
無相之相有相身
能令衆生歡喜禮
因是自高我慢除

鬘表萬字師子臆
腋掌合縵內外握
皮膚細輒毛右旋
細筋鎖骨鹿膺腸
淨水莫染不受塵
八十種好似可見
一切有相眼對絕
衆生身相相亦然
投心表敬誠殷勤
成就如是妙色軀

我等八萬之等衆
善滅思想心意識
稽首歸依法色身
稽首歸依妙種相
梵音雷震響八種
四諦六度十二緣
有聞莫不心意開
有聞或得須陀洹
無漏無爲緣覺處
或得無量陀羅尼

俱共稽首咸歸命
象馬調御無著聖
戒定慧解知見聚
稽首歸依難思議
微妙清淨甚深遠
隨順衆生心業轉
無量生死衆結斷
斯陀阿那阿羅漢
無生無滅菩薩地
無礙樂說大辯才

演說甚深微妙偈
或躍飛騰現神足
如是法輪相如是
我等咸復共稽首
稽首歸依梵音聲
世尊往昔無量劫
爲我人天龍神王
能捨一切諸難捨
於法內外無所恪
奉持諸佛清淨戒
遊戲澡浴法清渠
出沒水火身自由
清淨無邊難思議
歸依法輪轉以時
稽首歸依緣諦度
勤苦修習衆德行
普及一切諸衆生
財寶妻子及國城
頭目髓腦悉施人
乃至失命不毀傷

若人刀杖來加害
惡口罵辱終不瞋
歷劫挫身不倦惰
晝夜攝心常在禪
徧學一切衆道法
智慧深入衆生根
是故今得自在力
於法自在爲法王
我復咸共俱稽首
歸依能勤諸難勤

說法品第二

爾時大莊嚴菩薩摩訶薩與八萬菩薩摩訶薩說是
偈讚佛已俱白佛言世尊我等八萬菩薩之衆今者
欲於如來法中有所諮問不審世尊垂愍聽不佛告
大莊嚴菩薩及八萬菩薩言善哉善哉善男子善知

是時恣汝所問如來不久當般涅槃涅槃之後普令一切無復餘疑欲何所問便可說也於是大莊嚴菩薩與八萬菩薩卽共同聲白佛言世尊菩薩摩訶薩欲得疾成阿耨多羅三藐三菩提應當修行何等法門何等法門能令菩薩摩訶薩疾成阿耨多羅三藐三菩提佛告大莊嚴菩薩及八萬菩薩言善男子有一法門能令菩薩疾得阿耨多羅三藐三菩提若有菩薩學是法門者則能疾得阿耨多羅三藐三菩提世尊是法門者號字何等其義云何菩薩云何修行佛言善男子是一法門名爲無量義菩薩欲得修學

無量義者應當觀察一切諸法自本來今性相空寂無大無小無生無滅非住非動不進不退猶如虛空無有二法而諸衆生虛妄橫計是此是彼是得是失起不善念造衆惡業輪迴六趣備受苦毒無量億劫不能自出菩薩摩訶薩如是諦觀生憐愍心發大慈悲將欲救拔又復深入一切諸法法相如是生如是法法相如是住如是法法相如是異如是法法相如是滅如是法法相如是能生惡法法相如是能生善法住異滅者亦復如是菩薩如是觀察四相始末悉徧知已次復諦觀一切諸法念念不住新新生滅復

觀卽時生住異滅如是觀已而入衆生諸根性欲性
欲無量故說法無量說法無量故義亦無量無量義
者從一法生其一法者卽無相也如是無相無相不
相不相無相名爲實相菩薩摩訶薩安住如是眞實
相已所發慈悲明諦不虛於衆生所眞能拔苦苦既
拔已復爲說法令諸衆生受於快樂善男子菩薩摩
訶薩若能如是修一法門無量義者必得疾成阿耨
多羅三藐三菩提善男子如是甚深無上大乘無量
義經文理眞正尊無過上三世諸佛所共守護無有
衆魔羣道得入不爲一切邪見生死之所壞敗是故

善男子菩薩摩訶薩若欲疾成無上菩提應當修學
如是甚深無上大乘無量義經爾時大莊嚴菩薩復
白佛言世尊世尊說法不可思議衆生根性亦不可
思議法門解脫亦不可思議我等於佛所說諸法無
復疑難而諸衆生生迷惑心故重諮問世尊自從如
來得道已來四十餘年常爲衆生演說諸法四相之
義苦義空義無常無我無大無小無生無滅一相無
相法性法相本來空寂不來不去不出不沒若有聞
者或得爛法頂法忍法世第一法須陀洹果斯陀含
果阿那含果阿羅漢果辟支佛道發菩提心登第一

地第二第三至第十地往日所說諸法之義與今所說有何等異而言甚深無上大乘無量義經菩薩修行必得疾成無上菩提是事云何唯願世尊慈哀一切廣爲衆生而分別之普令現在及未來世有聞法者無餘疑網於是佛告大莊嚴菩薩善哉善哉大善男子能問如來如是甚深無上大乘微妙之義當知汝能多所利益安樂人天拔苦衆生眞大慈悲信實不虛以是因緣必得疾成無上菩提亦令一切今世來世諸有衆生得成無上菩提善男子自我道場菩提樹下端坐六年得成阿耨多羅三藐三菩提以佛

眼觀一切諸法不可宣說所以者何諸衆生等性欲不同性欲不同種種說法以方便力四十餘年未顯眞實是故衆生得道差別不得疾成無上菩提善男子法譬如水能洗垢穢若井若池若江若河溪渠大海皆悉能洗諸有垢穢其法水者亦復如是能洗衆生諸煩惱垢善男子水性是一江河井池溪渠大海各各別異其法性者亦復如是洗除塵勞等無差別三法四果二道不一善男子水雖俱洗而非池池非江河溪渠非海如來世雄於法自在所說諸法亦復如是初中後說皆能洗除衆生煩惱而初非中而

中非後初中後說文詞雖一而義各異善男子我起
樹王詣波羅柰鹿野園中爲阿若拘隣等五人轉四
諦法輪時亦說諸法本來空寂代謝不住念念生滅
中間於此及以處處爲諸比丘并衆菩薩辯演宣說
十二因緣六波羅蜜亦說諸法本來空寂代謝不住
念念生滅今復於此演說大乘無量義經亦說諸法
本來空寂代謝不住念念生滅善男子是故初說中
說今說文詞是一而義別異義異故衆生解異解異
故得法得果得道亦異善男子初說四諦爲求聲聞
人而八億諸天來下聽法發菩提心中於處處演說

甚深十二因緣爲求辟支佛人而無量衆生發菩提
心或住聲聞次說方等十二部經摩訶般若華嚴海
空宣說菩薩歷劫修行而百千比丘萬億人天無量
衆生得須陀洹斯陀含阿那含阿羅漢果住辟支佛
因緣法中善男子以是義故故知說同而義別異義
異故衆生解異解異故得法得果得道亦異是故善
男子自我得道初起說法至于今日演說大乘無量
義經未曾不說苦空無常無我真非假非大非小
本來不生今亦不滅一相無相法相法性不來不去
而衆生四相所遷善男子以是義故諸佛無有二言

能以一音普應衆聲能以一身示百千萬億那由他無量無數恒河沙身一一身中又示若干百千萬億那由他阿僧祇恒河沙種種類形一一形中又示若干百千萬億那由他阿僧祇恒河沙形善男子是則諸佛不可思議甚深境界非二乘所知亦非十住菩薩所及唯佛與佛乃能究了善男子是故我說微妙甚深無上大乘無量義經文理真正尊無過上三世諸佛所共守護無有衆魔外道得人不自爲一切邪見生死之所壞敗菩薩摩訶薩若欲疾成無上菩提應當修學如是甚深無上大乘無量義經佛說是已於

是三千大千世界六種震動自然空中雨種種華天優鉢羅華鉢曇摩華拘物頭華分陀利華又雨無數種種天香天衣天瓔珞天無價寶於空中旋轉來下供養於佛及諸菩薩聲聞大衆天廚天鉢器天百味克滿盈溢天幢天幡天軒蓋天妙樂具處處安置作天妓樂歌歎於佛又復六種震動東方恒河沙等諸佛世界亦雨天華天香天衣天瓔珞天無價寶天廚天鉢器天百味天幢天幡天軒蓋天妙樂具作天妓樂歌歎彼佛及彼菩薩聲聞大衆南西北方四維上下亦復如是於是衆中三萬二千菩薩摩訶薩得

無量義三昧二萬四千菩薩摩訶薩得無量無數陀羅尼門能轉一切三世諸佛不退法輪其諸比丘比丘尼優婆塞優婆夷天龍夜叉乾闥婆阿脩羅迦樓羅緊那羅摩睺羅伽大轉輪王小轉輪王銀輪鐵輪諸輪之王國王王子國臣國民國土國女國大長者及諸眷屬百千衆俱聞佛所說如是經時或得燻法頂法忍法世間第一法須陀洹果斯陀含果阿那含果阿羅漢果辟支佛果又得菩薩無生法忍又得一陀羅尼又得二陀羅尼又得三陀羅尼又得四陀羅尼五六七八九十陀羅尼又得百千萬億陀羅尼又得無量無數恒河沙阿僧祇陀羅尼皆能隨順轉不退轉法輪無量衆生發阿耨多羅三藐三菩提心

十功德品第三

爾時大莊嚴菩薩摩訶薩復白佛言世尊世尊說是微妙甚深無上大乘無量義經真實甚深甚深甚深所以者何於此衆中諸菩薩摩訶薩及諸四衆天龍鬼神國王臣民諸有衆生聞是甚深無上大乘無量義經無不獲得陀羅尼門三法四果菩提之心當知此法文理真正尊無過上三世諸佛之所守護無有衆魔羣道得不爲一切邪見生死之所壞敗所以

經
無量壽經
者何一聞能持一切法故若有衆生得聞是經則爲
大利所以者何若能修行必得疾成無上菩提其有
衆生不得聞者當知是等爲失大利過無量無邊不
可思議阿僧祇劫終不得成無上菩提所以者何不
知菩提大道直故行於險徑多留難故世尊是經典
者不可思議唯願世尊廣爲大衆慈哀敷演是經甚
深不思議事世尊是經典者從何所來去何所至住
何所住乃有如是無量功德不思議力令衆疾成阿
耨多羅三藐三菩提爾時世尊告大莊嚴菩薩言善
哉善哉善男子如是如是如汝所言善男子我說是

經甚深甚深真實甚深所以者何令衆疾成無上菩
提故一聞能持一切法故於諸衆生大利益故行大
直道無留難故善男子汝問是經從何所來去至何
所住何住者當善諦聽善男子是經本從諸佛室宅
中來去至一切衆生發菩提心住諸菩薩所住之處
善男子是經如是來如是去如是住是故此經能有
如是無量功德不思議力令衆疾成無上菩提善男
子汝寧欲聞是經復有十不思議功德力不大莊嚴
菩薩言願樂欲聞佛言善男子第一是經能令菩薩
未發心者發菩提心無慈仁者起慈仁心好殺戮者

起大悲心生嫉妬者起隨喜心有愛著者起能捨心
諸慳貪者起布施心多憍慢者起持戒心瞋恚盛者
起忍辱心生懈怠者起精進心諸散亂者起禪定心
於愚癡者起智慧心未能度彼者起度彼心行十惡
者起十善心樂有爲者志無爲心有退心者作不退
心爲有漏者起無漏心多煩惱者起除滅心善男子
是名是經第一功德不思議力善男子第二是經不
可思議功德力者若有衆生得是經者若一轉若一
偈乃至一句則能通達百千億義無量數劫不能演
說所受持法所以者何以是法義無量故善男子是

經譬如從一種子生百千萬百千萬中一一復生百
千萬數如是展轉乃至無量是經典者亦復如是從
一法生百千義百千義中一一復生百千萬數如是
展轉乃至無量無邊之義是故此經名無量義善男
子是名是經第二功德不思議力善男子第三是經
不可思議功德力者若有衆生得聞是經若一轉若
一偈乃至一句通達百千萬億義已雖有煩惱如無
煩惱出生入死無怖畏想於諸衆生生憐愍想於一
切法得勇健想如壯力士能擔能持諸有重者是持
經人亦復如是能荷無上菩提重任擔負衆生出生

死道未能自度已能度他猶如船師身嬰重病四體不御安止此岸有好堅牢舟船常辦諸度彼者之具給與而去是持經者亦復如是雖嬰五道諸有之身百八重病常恒相纏安止無明老死此岸而有堅牢此大乘經無量義辯能度衆生衆生如說行者得度生死善男子是名是經第三功德不思議力善男子第四是經不可思議功德力者若有衆生得聞是經若一轉若一偈乃至一句得勇健想雖未自度而能度他與諸菩薩以爲眷屬諸佛如來常向是人而演說法是人聞已悉能受持隨順不逆轉復爲人隨宜

廣說善男子是人譬如國王夫人新生王子若一日若二日若至七日若一月若二月若至七月若一歲若二歲若至七歲雖復不能領理國事已爲臣民之所宗敬諸大王子以爲伴侶王及夫人愛心偏重常與共語所以者何以稚小故善男子是持經者亦復如是諸佛國王是經夫人和合共生是菩薩子若是菩薩得聞是經若一句若一偈若一轉若二轉若十若百若千若萬若億萬恒河沙無量無數轉雖復不能體真理極雖復不能震動三千大千國土雷震梵音轉大法輪已爲一切四衆八部之所宗仰諸大菩

經
無量壽經
薩以爲眷屬深入諸佛祕密之法所可演說無違無
失常爲諸佛之所護念慈愛徧覆以新學故善男子
是名是經第四功德不思議力善男子第五是經不
可思議功德力者若善男子善女人若佛在世若滅
度後其有受持讀誦書寫如是甚深無上大乘無量
義經是人雖復具縛煩惱未能遠離諸凡夫事而能
示現大菩提道延於一日以爲百劫百劫亦能促爲
一日令彼衆生歡喜信伏善男子是善男子善女人
譬如龍子始生七日卽能興雲亦能降雨善男子是
名是經第五功德不思議力善男子第六是經不可

思議功德力者若善男子善女人若佛在世若滅度
後受持讀誦是經典者雖具煩惱而爲衆生說法令
遠離煩惱生死斷一切苦衆生聞已修行得法得果
得道與佛如來等無差別譬如王子雖復禮小若王
巡遊及以疾病委是王子領理國事王子是時依大
王命如法教令羣僚百官宣流正化國土人民各隨
其安如大王治等無有異持經善男子善女人亦復
如是若佛在世若滅度後是善男子雖未得住初不
動地依佛如是所用說教而敷演之衆生聞已一心
修行斷除煩惱得法得果乃至得道善男子是名是

經第六功德不思議力善男子第七是經不可思議
功德力者若善男子善女人若佛在世若滅度後得
聞是經歡喜信樂生希有心受持讀誦書寫解說如
法修行發菩提心起諸善根興大悲意欲度一切苦
惱衆生未得修行六波羅蜜六波羅蜜自然在前卽
於是身得無生法忍生死煩惱一時斷壞昇於菩薩
第七之地譬如健人爲王除怨怨旣滅已王大歡喜
賞賜半國之封悉以與之持經男子女人亦復如是
於諸行人最爲勇健六度法寶不求自至生死怨敵
自然散壞證無生忍半佛國寶封賞安樂善男子是

名是經第七功德不思議力善男子第八是經不可
思議功德力者若善男子善女人若佛在世若滅度
後有人能得是經典者敬信如視佛身令等無異愛
樂是經受持讀誦書寫頂戴如法奉行堅固戒忍兼
行檀度深發慈悲以此無上大乘無量義經廣爲人
說若人先來都不信有罪福者以是經示之設種種
方便彊化令信以經威力故令其人心歛然得迴信
心旣發勇猛精進故能得是經威德勢力得道得果
是故善男子善女人以蒙化功故男子女人卽於是
身得無生法忍得至上地與諸菩薩以爲眷屬速能

成就衆生淨佛國土不久得成無上菩提善男子是名是經第八功德不思議力善男子第九是經不可思議功德力者若善男子善女人若佛在世若滅度後有得是經歡喜踊躍得未曾有受持讀誦書寫供養爲人分別解說經義者卽得宿業餘罪重障一時滅盡便得清淨速得大辯次第莊嚴諸波羅蜜獲諸三昧耆楞嚴三昧入大總持門得勤精進力速得越上地善能分身散體徧十方國土拔濟一切二十五有極苦衆生悉令解脫是故是經有如此力善男子是名是經第九功德不思議力善男子第十是經

不可思議功德力者若善男子善女人若佛在世若滅度後若得是經發大歡喜生希有心旣自受持讀誦書寫供養解說如法修行旣令餘人修行是經力故得道得果皆由是善男子善女人慈心勸化力故是善男子善女人卽於是身便逮無量諸陀羅尼門於凡夫地自然初時能發無數阿僧祇弘誓大願深能發救一切衆生成就大悲廣能拔苦厚集善根饒益一切而演法澤洪潤枯涸以此法藥施諸衆生安樂一切漸見超登位法雲地恩澤普潤慈被無外

攝苦衆生令入道迹是故此人不久得成阿耨多羅
三藐三菩提善男子是名是經第十功德不思議力
善男子如是無上大乘無量義經極有大威神之力
尊無過上能令諸凡夫皆成聖果永離生死皆得自
在是故是經名無量義也能令一切衆生於凡夫地
生起諸菩薩無量道芽令功德樹鬱盛扶踈增長是
故此經號不可思議功德力也於時大莊嚴菩薩摩
訶薩及八萬菩薩摩訶薩同聲白佛言世尊如佛所
說甚深微妙無上大乘無量義經文理真正尊無過
上三世諸佛所共守護無有衆魔羣道得入不爲一

切邪見生死之所壞敗是故此經乃有如是十功德
不思議力也大饒益無量一切衆生令一切諸菩薩
摩訶薩各得無量義三昧或得百千陀羅尼門或得
菩薩諸地諸忍或得緣覺阿羅漢四道果證世尊慈
愍快爲我等說如是法令我大獲法利甚爲奇特未
曾有也世尊慈恩實難可報作是語已爾時三千大
千世界六種震動於上空中復雨種種華天優鉢羅
華鉢曇摩華拘物頭華分陀利華又雨無數種種天
香天衣天瓔珞天無價寶於上空中旋轉來下供養
於佛及諸菩薩聲聞大衆天廚天鉢器天百味克滿

盈溢見色聞香自然飽足天幢天幡天軒蓋天妙樂
具處處安置作天妓樂歌歎於佛又復六種震動東
方恒河沙等諸佛世界亦雨天華天香天衣天瓔珞
天幢天幡天軒蓋天妙樂具作天妓樂歌歎彼佛及
彼菩薩聲聞大衆南西北方四維上下亦復如是爾
時佛告大莊嚴菩薩摩訶薩及八萬菩薩摩訶薩言
汝等當於此經應深起敬心如法修行廣化一切勤
心流布常當殷勤晝夜守護令諸衆生各獲法利汝
等真是大慈大悲以立神通願力愛護是經勿使疑

滯於當來世必令廣行閻浮提令一切衆生得見聞
讀誦書寫供養以是之故亦疾令汝等速得阿耨多
羅三藐三菩提是時大莊嚴菩薩摩訶薩與八萬菩
薩摩訶薩卽從座起來詣佛所頭面禮足繞百千匝
卽前胡跪同聲白佛言世尊我等快蒙世尊慈愍爲
我等說是甚深微妙無上大乘無量義經敬受佛勅
於如來滅後當廣令流布是經典者普令一切受持
讀誦書寫供養唯願世尊勿垂憂慮我等當以願力
普令一切得是經典威神之福爾時佛讚言善哉善
哉諸善男子汝等今者真是佛子大慈大悲深能拔

苦救厄者矣一切衆生之良福田廣爲一切作大良導一切衆生大依止處一切衆生之大施主常以法利廣施一切爾時大會皆大歡喜爲佛作禮受持而去

無量義經

音釋

睫

音接

胸

音舜

臚

丑恭切

臚

音善

燻

與爇同

爇

與爇同

爇

江西九江府信士邢懋願施貲刻此
無量義經一卷 益州沙門性淨對
普書 上元許一科刻
萬曆戊戌仲夏徑山寂照庵識

長洲徐

法華三昧經

宋涼州沙門釋智嚴譯

佛在羅閱祇耆闍崛山中與諸尊弟子比丘千二百五十菩薩七萬三千人諸釋梵不可復計十方飛來無央數皆神通妙達復有他方恒邊沙諸天人及諸菩薩如是等百億千恒沙皆來會在佛前坐時舍利弗須菩提等諸尊菩薩皆有疑心念言何因緣諸上人皆來在是間會有何異要之瑞應爾時諸弟子起疑心念爲佛作禮長跪欲問佛佛時已放無數光從口出若干億意稍稍引大徧虛空明遠照恒邊沙刹

土地復震動於是盡明卽不復見佛身相大衆愕然
共議佛三昧爲何所之趣各自思之卽便還坐三昧
求佛至處坐前有菩薩名慧相便報言善哉善哉當
爾賢者思惟了不知所至處須臾羅閱王後宮太子
皇女及姝女夫人三萬二千人皆從共來詣山中到
不見佛復有不想菩薩問王將從何多王各辯通答
言見佛光明故來耳王女名利行便問菩薩佛今所
在爲到何方答曰向已求佛了不知處女答曰卿是
佛第一神通者應當知處菩薩答曰且坐須臾頃地
卽震動從地中出坐自然大寶蓮華上衆坐上人愕

然王女利行起爲佛作禮訖住佛前說偈問佛

向見大光明 疑佛有異要 故來將大衆

欲問心狐疑 反更不見佛 意甚有怪驚

願得具爲說 當令大衆解 各發一三昧

推求佛身相 了言不知處 各共坐作議

更起何三昧 畢欲求佛意 女來問衆等

佛今爲所在 純行有至心 必欲有所問

願見世尊授 令意解狐疑 具爲現衆等

分別解說之 向所三昧處 所名在何所

佛語女利行所問甚深當爲汝分別說向所三昧名

法華譬如大國中有一樹有一華覆三千大千刹十
其香熏恒邊沙佛國若有人得聞名字若知解自然
疾得是三昧若諸病痛者得聞是三昧應時自解人
根衆病消盡女利行問佛何謂華之威德乃有是慧
佛語女利行華者一樹之色人見莫不愛樂欲得之
者法華三昧是生死中之色大光受有形人不知不
聞不信是三昧不奉行之未應菩薩不見慧失人之
本反隨末流終已不見明女利行復問佛今欲得是
三昧行何法有幾事行得人中願佛弘慈恩潤廣開
行議令一切聞解皆入三昧中佛言善哉善哉多所

度脫說度無極有二事何謂爲二一者知法身如幻
如化二者知姪怒癡無根無形佛爾時說偈言

法身有一切 化幻現沉浮 姪怒癡無形

如水現泡沫 觀察人身份 如滅無形住

離散合自成 分別計皆空

佛語女利行復有四事別如行三昧者何謂爲四一
者行戒無色想二者行檀無受者三者不戢無亂者
四者行智無愚者是爲四佛爾時說偈言

不犯戒無毀 行檀不入智 不戢無癡亂

不愚無智慧 不說無行者 有行不言向

三昧可得入 無處無中邊

佛語女利行復有三十六事是為三昧所見事何謂三十六事不見生不見死不減不增不入不在外不在內無住無止無水色無火色無風色無地色無痛無痒無思無想無生無死無識無貪無姪無瞋無恚無愚無癡無慳無施無惡無善無心無意無識行不起上若干事不滅上若干事如一無形像是為三十六事法華所見事佛爾時說偈言

不想念無念 不行色想惡 無行法華淨

空寂無吾我 不處有人中 沒滅無形像

不觀善以惡 俱皆空自然

佛告女利行法華三昧所見譬亦如是佛說是三十六事品時無數天人及世間大眾人及王所侍從大小合有四十億萬皆發無上正真道意女利行及後宮人三萬二千姪女夫人逮得無所從生法樂於中立女見眾人皆發道意心甚歡喜起為佛作禮繞佛三匝住佛前說偈言

世尊實神妙 演知三世事 斷世姪怒垢

開化沫流人 皆到無為城 快樂乃安寧

如是天人中 地為大動傾 今日合大眾

億億百萬千 當來及過去 現在得自然
願得大普恩 法華威神力 三界一切人
皆得是三昧 令我值在世 常行法華事
使世無老死 快樂無憂患 三苦自然除
皆如是三昧 空想於願識 自然現相好
教授沫流人 得意慈普行 光光威儀好
等身爲如來 合聚於沫生 三昧豫生行
便使於空中 得慧如上首

女利行說偈已作是念今欲教授人不見法則何事
開解人佛卽知女心中念便語女欲持何法教何人

法復何所在人復何所止立女白佛言如是所說無
法無教無人佛語女無法有八事行無教有六事除
無人有七事散女問佛何謂八事行六事除七事散
佛言一者直見不邪二者直聞不聽三者直治不曲
四者直說不煩五者直行不迷六者直念不思七者
直意不動八者直受不尋是爲八事行無法何謂無
教六事除一者不念有見無見無二者不念有聲無
聲無三者不念有味無味無四者不念有香無香無
五者不念有觸無觸無六者不念有意無意無是爲
六事除何謂無人七事散無水色無風色無火色無

地色無心色無識色無行色是爲七事散無人可教
當作此解佛爾時說偈言

若有解法華 三昧要句品 當念勤精進

曉解得正言 七八六已足 計本無形迹

不受自可欲 去想安寂然 說法無言教

不見有壽命 人本空無寂 不解沫言有

不除不斷欲 出入無住處 無痛無思想

不生不死滅 有念爲勞苦 不復著因緣

示現有色欲 已反愛灰塵 觀見有病痛

常意與本并 慧見不空念 寂然安空空

法華三昧現 不出不入住 無見不見空

是爲疾得如 便能行施法 以慧爲布施

說慧等如是 諸佛皆稱歎

女聞說是時倍復踊躍歡喜起爲佛作禮踊在空中
去地七尺還坐金剛蓮華上時坐中有比丘心念言
是爲真是女爲幻人自起爲佛作禮長跪叉手說偈
問佛言

本自生愚癡 不識道慧義 不知女利行

爲是真男女 審是一定人 用法何復問

真是女子身 所問何以深 生來侍佛法

未見如是人 所見非凡及 智慧何以爾
本從何方來 而生於王家 宿命行何法
逮及幾佛來 精進健乃爾 所問如來報
或具真有行 能問如有說 能忍有柔意
但能口說行 伏心意何如 實欲往試之
可應幾法住 住對不起意 若實有智慧
我欲從解要 省視所說法 詠演入道俗
有何異心意 獨得是智慧

佛便語比丘言自若干因緣卽說偈報言

女利行本心 立德識本處 在世來千歲

常習於三昧 心解衆色要 寂然與禪同
真是女子身 不爲化來現 本從無色世
今來在此界 續復如本行 已行便立正
無身現說心 普念衆慈行 念法空爲本
不起因緣相 比丘自不解 何怪是女身
不見無有本 反自受縛著 禪思欲去色
更反爲色亂 遠苦避三毒 已入三毒苦
汝自不解身 自謂得常安 萬物如幻化
入出無形住 四色本虛空 自然受形著
愛習自拘限 壞本起末故

爾時比丘八萬四千人聞說偈意解卽發無上正真
道意不可計天人散華名香皆來供養佛時舍利弗
心念女子乃有是辯何不去女卽男佛卽知舍利弗
心所念便語舍利弗汝自問女舍利弗卽問唯女利
行所說非常事汝與如來共對語何不去女卽男女
利行答言唯舍利弗道德之要以慧善見不視於末
四色是地水火風五情合六入爲衰心意識如幻如
化出入無形癡意不盡故與三流對更出浮沉何足
珍雖漏盡結解有不淨想無色如爲惡苦住反爲樂
舍利弗問學佛之法應有誦毀言不女問賢者舍利

弗云何爲誦毀答言一好一惡是爲誦毀女報言未
曉未了大人所說不以小爲小大爲大好惡無二等
無異誦身身是色誦意意無形四色法空無形無造
何所受誦毀者舍利弗答曰卿所說是菩薩大人所
行卿未應菩薩何緣乃說此事女報言大人爲以何
立報言普等爲立何謂爲普教授十方人遠苦得道
是爲普唯賢者所說不說皆說生死勤苦耳女語舍
利弗謂爲普者不見有人無人有教無教有法無法
所念是曰爲普不爲見生死苦欲教之令得道是爲
普舍利弗無有辯才析答此言女爾時說偈歎曰

人用三塵亂 輒爲六衰著 五惡十賊對
三厄墮困窮 十二連相續 四色拘沒三
不解名顛倒 坐受空聚藏 無故沒三姓
自網投深淵 堅藏畏二三 自滅更受生
宛爲空所縛 恒懷不淨想 自呼是常安
爲得真自然 是輩滿閻浮 億億百萬千
所行徧十方 不益一切人 當有隨受行
皆共墮海流 可作大法行 入海免欲根
決海令滅盡 平故無還流 返原盡欲室
令人歸故鄉 故鄉名無爲 號字清淨堂

快樂多紫金 入出揚光明 恒邊沙劫佛
莫不稱歎說 以法空無戲 無相不願識
淵流以海水 皆復不足說 廣意開化人
自然常自安 惟念諸賢者 乃自反不解
無故自受縛 幻化受報應
爾時四萬二千羅漢皆生意第七住八萬五千釋梵
皆逮無所行從生六萬四千賢女起爲佛作禮住佛
前說偈言
今日女利行 爲我衆等說 聞說佛深法
令我心開解 實欲知道德 皆從何所來

聚合衆一切 有何神妙德 而致興大衆
莫不驚愕心 伏意往樂從 隨教之所行
願欲求天尊 愍發起濯衆 至心受大慧
如來神化現 應時諸女身 倒願去色欲
便欲作沙門 佛之知我情 畢覺諸審諦
使身如菩薩 宣佛神道教 當復轉化人
諸賢大衆女 俱起在佛前 頭面稽首禮
願得如佛形

佛語諸女所說實至心今欲求所願先當報父母次
當復由王得聽可去耳於是諸女說偈報白言

欲願作沙門 先當報父母 次當復由王
得聽可作道 爲道不苦晚 但當懃開心
曉解心意本 一切與同等 便有決大意
心解乃至道 道從解心起 不住於縛著
化達觀衆見 如復心出生 從本知本空
知皆非常苦 心亂便隨流 所見必有對
不生善惡想 爾乃作沙門

諸賢女起往至父母所長跪白父母及大王今日受
王恩德來詣佛所爲尊女利行問佛深妙法欲求無
爲道現身及一切佛爲女說本末生死苦痛但爲色

欲著不知道德本緣是無常至當就三苦勤願欲作沙門願父母聽我作沙門當得道還度父母父母語諸女求自然道各自見便利隨意所習行汝曹尚去我亦隨汝去汝自白語王得聽便自去用問我爲諸女稽首大王前淚出而言人在三界中苦欲坐色想不得自在無常卒至無有代者實欲作沙門并與諸女俱無爲得道者當還度父王願從本意王語女利行等早欲使汝去隨行作沙門以汝三事未足是以不遣汝耳一者未盡學識諸禮教二者常樂未有見苦三者口食恣味未有足者以是故不欲遣汝耳若有至意者便去勿疑吾亦欲作沙門王卽起至佛所作禮白佛言聞說智慧意甚願樂國付太子身歸三尊給侍左右并受法教欲作沙門求道如佛佛卽放光若干種色其明照十方地爲六反震動諸天作樂覆滿於虛空散華名寶覆三千大千刹土天下丘墟皆平其有大山化爲黃金枯木更生中有不端正者皆得願樹木枯者皆生條葉自然風吹皆歌歎佛功德生華者卽自墮落各氣到佛所羅住空中各說偈讚佛功德

今蒙聖神力 得救死復生 光色還本然

復實滋道成 生死姪亂色 譬於枯木時
值佛說音聲 還來合本并 六色耽著冥
四色合五欲 分別法空然 解道成法行
爲得真定智 快樂得安寧 一切皆歡喜
稽首禮佛足

爾時諸六通及羅漢見華有是說女利行卽化爲男子復爲菩薩一女子作是二化變衆坐莫不歡喜時一佛刹中無有女人諸六通道者十萬五千人三萬須陀洹皆得阿惟越致八萬六千人及阿那含皆得柔順法忍不可計羅漢更發無上正真道意其有辟

支佛行卽如彌勒輩王卽以國付太子太子名辯積拜跪白大王王爲欲施子孫之殃與色身之福施子孫當以法財之利持誅滅之怨大罪與子孫大國之治世世漏没人根不知大慧滅善之路與子孫當奈何父王有教不得不從輒便禮拜辭王而去還國宮殿坐領國普告若不到佛所求無爲道作善孝者罪與三逆等太子於殿上精進勇慧廣開大道心意甚過本無量卽滅一切之惡地卽爲六反震動時人民皆言願太子便得作佛我曹大衆皆當承第亦當作佛佛時笑五色光出照於十方佛刹人民皆發願令

我得道如佛天下飲食自然在前如忉利天上其國
菩薩皆如阿彌陀國中太子辯積得功德在宮七日
出詣佛所從大衆羣臣大小人民無央數至佛所爲
作禮住佛前說億億萬千偈讚曰

佛作三昧決

功德甚巍巍

光相威神照

感動三千刹

施人無上慧

德普入衆心

感發開童蒙

莫不受福成

演詠法華事

改世濯羣異

降伏獷強者

和更受柔順

等尋道場光

世人受業長

去老逮空寂

不死而復生

除病遠穢辱

色想沒滅勞

陰蓋卽以除

清淨無欲塵

思想受欲定

流布逮無爲

空定常寂然

不住不然行

不行無法識

示現光相成

本法無增減

常安寂空

如來現神化

一切得眞道

愚癡寂然定

心與無生同

我今聽說法

演出法華慧

心解得發願

一切得如佛

今欲城國土

願便說法華

以何法行得

當有幾事解

疾得是法華

依議說其慧

皆令分別知

一切心得解

曉了諸法事

當從中外得

得之爲遠近

便可立得佛

復更於劫數 又從幾佛受 解慧而有要
須臾變化成 願以具演說 皆令大眾知
太子及衆人 作禮還復坐

佛語女利行欲知法華之開解所示現也當來過去
現在諸佛皆從是散身譬喻品得道知諦爾時有億
百千天及諸梵不可計人民四十八萬菩薩遠得無
所從生其有聲聞皆更發意時不想菩薩白佛言今
日大眾聽聞法華三昧解說事要都未受決佛告菩
薩今日說法華三昧者皆以授決有劫數各各自有
國土處所是故不復說耳若汝不解自往皆問之時
太子及女利行卽白菩薩心中所欲問卽各說偈報
言

惟賢上智慧	何以不解要	其有求想報
皆爲不受慧	當說有處所	則非法華事
要當須口說	欲聽真高聲	不解其本末
語亦俱不知	指示道徑法	猶若如盲人
師子之大音	尚復呼小聲	受決已得佛
不知禮正道	受決有國土	譬亦如幻化
有對便出應	不復豫思想	見附住教授
彌及去來今	神通無不知	不復有言說

受決在空無 寂然安無爲 常定不動轉
私細人不知 開演於未然 寂靜無所爲
是爲所樂國 清淨爲證正 不念有思想
是爲決法安 相好示光明 是爲勤苦現
弟子有人民 是爲入欲濁 不苦不勤念
都盡不起滅

如是說十八萬億偈報菩薩卽歡喜說偈讚曰

我自生愚癡 不解上人語 不知其音法

及呼未授決 如今所說偈 甚深難具陳

願發本時意 與神共參論

時太子白佛言今諸賢皆尚不解要以善權方便開
解佛卽笑五色光從心口出十方皆明阿難白佛佛
不妄笑笑必有意願聞其說佛語阿難汝見大衆不
阿難答言見今是如來問皆具答各各在十方教化
度恒沙等天人民皆使作佛爾時自然雨香華七寶
覆三千大千刹土而周帀徧無有空處佛語太子此
法華所解人身之事如是爾時不可計恒沙百千人
民皆發無上正真道意逮無所從生心無數千聲聞
皆逮阿惟越致地阿難長跪白佛言此名何經云何
奉行佛語阿難名法華三昧女利行所問解人身散

情經要集若有男女書寫諷誦讀勝行檀八十劫若
供養勤跪拜者勝菩薩行慈三千億萬劫若當曉解
展轉相教勝供養恒邊沙佛若有一聞是經者不復
更生死勤苦不信謫者此人以隨末流未復還本佛
語阿難囑累汝法華三昧事千劫尚不能盡麤說要
諦受書持奉行勿得減一字正書句逗相得太子所
從大衆開解各得道慧皆如上首起爲佛作禮而去
法華三昧經

音釋

愕

五各切

痒

余兩切

獷

古猛切

驚遽也 欲搔也 嘉興居士王大周施資刻此 法華三昧經 嘉禾釋道梅對 萬曆戊戌冬徑山寂照庵藏

薩曇芬陀利經

僧祐錄云安公失譯人名附西晉錄

聞如是佛在羅閱祇耆闍崛山中與大比丘衆四萬
二千人俱三慢陀颯陀文殊師利菩薩等八萬四千
人彌勒菩薩等拔陀劫中千人釋王等與忉利諸天
不可復計梵王與諸梵不可復計阿闍世王與閻浮
提人王衆多不可復計佛在四輩弟子比丘比丘尼
優婆塞優婆夷中說薩曇芬陀利漢言佛說無央數
偈是時七寶浮圖涌從地出上至梵天浮圖中央有
七寶大講堂懸幢幡華蓋名香清潔姝好講堂中有

金牀牀上有坐佛佛字袍休羅蘭漢言大寶歎釋迦文佛
言善哉善哉我般泥洹以來過恒邊沙劫恒邊沙佛
刹止於空中恒邊沙佛以過去我歷爾所劫初不還
彼刹我見釋迦文佛精進求佛道用人民故布施無
厭足不惜手不惜眼不惜頭不惜妻子象馬車乘不
惜珍寶無有貪愛心我故來出欲供養釋迦文佛并
度諸下劣願釋迦文佛坐我金牀更說薩曇芬陀利
經於是釋迦文佛上講堂就於金牀而坐便說薩曇
芬陀利經復說無央數偈言

聞樂寶佛 知名字者 不畏生死 不復勤苦

聞藥王佛 知名字者 可得愈病 自識宿命
於是釋迦文佛說無央數阿僧祇劫復說無央數阿
僧祇劫我行菩薩道時求索薩曇芬陀利經布施與
人在所求索飯食衣被七寶妻子初無愛戀心我爲
有國王時是世極長壽我便立太子爲王棄國事搥
鼓搖鈴自銜身言誰欲持我作奴者我求索薩曇芬
陀利經我欲行供養時有一婆羅門語我言與我作
奴來我有薩曇芬陀利經我便隨婆羅門去一心作
奴汲水掃地採華果飲食婆羅門千歲不懈怠佛於
是說偈言

經
南齊書卷之九
持我作奴者

擗鼓搖鈴願 自銜言誰欲
我欲行供養 奴心善意行

佛言是時王者我身是也時婆羅門者調達是誰恩
今我得滿六波羅蜜者三十二相八十種好皆是調
達福恩調達是我善師善師恩令我得滿六波羅蜜
三十二相八十種好威神尊貴度脫十方一切皆是
調達恩調達却後阿僧祇劫當得作佛號名提和羅
耶漢言天王佛當得十種力三十二相八十種好天王佛
國名提和越漢言天天王佛當爲人民說法盡劫不
懈止第一說法當度恒邊沙人得羅漢道恒邊沙人

得辟支佛道恒邊沙人發阿耨多羅三藐三菩提心
爾時天王佛壽二十劫乃般泥洹後法住二十劫天
王佛般泥洹後不散舍利起作一七寶塔廣六十里
長八十里一切閻浮人悉往供養佛舍利是時無央
數人得羅漢道無央數人發辟支佛心無央數人發
阿耨多羅三藐三菩提心善男子善女人聞是法華
之經信不誹謗除滅過去當來罪閉三惡道門開三
善道門生天上常第一生人中常第一生十方佛前
自然七寶蓮華中化生於是下方佛所從菩薩名般
若拘自白其佛早還本土釋迦文佛謂般若拘我有

菩薩字文殊師利可與相見乃還本土卽時文殊師利從娑竭龍王池中涌出坐大蓮華華如車輪其華千葉從諸菩薩其數甚多文殊師利下大蓮華爲二佛作禮還與般若拘菩薩相問訊般若拘問文殊所入池中度云何數多少文殊答曰其數甚多無能計者若當口說非心所信自當有證其池卽時涌華從下而出盡是池中一切所散本發菩薩心者其華在空中但說摩訶衍事本發聲聞者其華在空中但說斷生死事文殊師利見華如是以偈答般若拘菩薩言以仁者之意自分別其數般若拘菩薩復問文殊師利說何等法所度乃爾文殊答曰於是池中但說薩曇芬陀利般若拘復問其法甚尊無能及者爲有便可得佛者不文殊答曰娑竭龍王有女年八歲智慧甚大意願不輕便可得佛般若拘菩薩謂文殊師利言我見仁者之師求佛勤苦積累功德劫數甚多不信此女便可得佛池中有女卽時涌出繞佛三匝叉手而白佛言佛相好端正功德巍巍爲諸天所奉爲一切龍鬼神人民薩和薩所敬所說法甚尊今我立願便欲得佛舍利弗卽謂女雖發是願佛不可得又汝女行積功累行未應菩薩女自持一摩尼珠其

價當一大國女疾過與佛佛亦疾受女謂舍利弗及
般若拘菩薩我與佛珠爲遲疾各曰甚疾女復言佛
受我珠爲遲疾答曰甚疾女言我與佛珠爲遲佛受
我珠復遲我今取佛疾於是卽時女身變爲菩薩衆
會皆驚卽變爲佛身三十二相八十種好皆具是國
土弟子如佛所爲一切衆會天龍鬼神無央數人皆
發無上正真道意三千大千國土六反震動三萬須
陀洹得阿惟越致

薩曇芬陀利經

嘉興居士王大周施資刻此 薩曇芬陀利經 嘉禾釋道佛
對 長洲徐普書 稿李朱善刻 萬曆戊戌孟冬徑山寺識

御製觀世音普門品經序

觀世音菩薩以爍迦羅心應變無窮自在神通徧遊
灑界入微塵國土說法濟度具足妙相弘誓如海凡
有因緣發清淨心纔舉聲稱卽隨聲而應所有願欲
卽獲如意妙法蓮華經普門品者爲度脫苦惱之真
詮也人能常以是經作觀一念方萌卽見大悲勝相
能滅一切諸苦其功德不可思議朕惟天道福善禍
淫故佛示果報使人爲善而不敢爲惡夫天堂地獄
皆由人爲不違於方寸之內故爲善者得升天堂爲
惡者卽墮地獄夫忠臣孝子吉人貞士其心卽佛故

神明芘佑業障俱泯是以生不犯於憲條沒不墮於無間夫克頑之徒一於爲惡棄五倫如敝帚蹈刑法如飲甘寧餒羅刹不欽佛道然人性本善所爲惡者特氣質之偏苟能改心易慮修省避畏轉移之間惡可爲善矣爲善則卽善人昔之所積之咎如太空點塵紅爐片雪消滌淨盡雖有果報將安施乎朕恒念此惟恐世之人有過而不知改乃甘心焉以自棄遂表意是經使善良君子永堅禁戒之心廣納無量之福爲善功德豈有涯涘哉

永樂九年五月初一日

妙法蓮華經觀世音菩薩普門品經

姚秦三藏法師鳩摩羅什譯長行

隋北天竺沙門闍那笈多譯重頌

爾時無盡意菩薩卽從座起偏袒右肩合掌向佛而作是言世尊觀世音菩薩以何因緣名觀世音佛告無盡意菩薩善男子若有無量百千萬億衆生受諸苦惱聞是觀世音菩薩一心稱名觀世音菩薩卽時觀其音聲皆得解脫若有持是觀世音菩薩名者設入大火火不能燒由是菩薩威神力故若爲大水所漂稱其名號卽得淺處若有百千萬億衆生爲求金

銀瑠璃碑礫碼珊瑚琥珀真珠等實入於大海假使黑風吹其船舫飄墮羅刹鬼國其中若有乃至一人稱觀世音菩薩名者是諸人等皆得解脫羅刹之難以是因緣名觀世音若復有人臨當被害稱觀世音菩薩名者彼所執刀杖尋段段壞而得解脫若三千大千國土滿中夜叉羅刹欲來惱人聞其稱觀世音菩薩名者是諸惡鬼尚不能以惡眼視之況復加害設復有人若有罪若無罪桎械枷鎖檢繫其身稱觀世音菩薩名者皆悉斷壞卽得解脫若三千大千國土滿中怨賊有一商主將諸商人齎持重寶經過

險路其中一人作是唱言諸善男子勿得恐怖汝等應當一心稱觀世音菩薩名號是菩薩能以無畏施於衆生汝等若稱名者於此怨賊當得解脫衆商人聞俱發聲言南無觀世音菩薩稱其名故卽得解脫無盡意觀世音菩薩摩訶薩威神之力巍巍如是若有衆生多於淫欲常念恭敬觀世音菩薩便得離欲若多瞋恚常念恭敬觀世音菩薩便得離瞋若多愚癡常念恭敬觀世音菩薩便得離癡無盡意觀世音菩薩有如是等大威神力多所饒益是故衆生常應心念若有女人設欲求男禮拜供養觀世音菩薩便

生福德智慧之男設欲求女便生端正有相之女宿
植德本衆人愛敬無盡意觀世音菩薩有如是力若
有衆生恭敬禮拜觀世音菩薩福不唐捐是故衆生
皆應受持觀世音菩薩名號無盡意若有人受持六
十二億恒河沙菩薩名字復盡形供養飲食衣服臥
具醫藥於汝意云何是善男子善女人功德多不無
盡意言甚多世尊佛言若復有人受持觀世音菩薩
名號乃至一時禮拜供養是二人福正等無異於百
千萬億劫不可窮盡無盡意受持觀世音菩薩名號
得如是無量無邊福德之利無盡意菩薩白佛言世
尊觀世音菩薩云何遊此娑婆世界云何而爲衆生
說法方便之力其事云何佛告無盡意菩薩善男子
若有國土衆生應以佛身得度者觀世音菩薩卽現
佛身而爲說法應以辟支佛身得度者卽現辟支佛
身而爲說法應以聲聞身得度者卽現聲聞身而爲
說法應以梵王身得度者卽現梵王身而爲說法應
以帝釋身得度者卽現帝釋身而爲說法應以自在
天身得度者卽現自在天身而爲說法應以大自在
天身得度者卽現大自在天身而爲說法應以天大
將軍身得度者卽現天大將軍身而爲說法應以毗

沙門身得度者卽現毗沙門身而爲說法應以小王
身得度者卽現小王身而爲說法應以長者身得度
者卽現長者身而爲說法應以居士身得度者卽現
居士身而爲說法應以宰官身得度者卽現宰官身
而爲說法應以婆羅門身得度者卽現婆羅門身而
爲說法應以比丘比丘尼優婆塞優婆夷身得度者
卽現比丘比丘尼優婆塞優婆夷身而爲說法應以
長者居士宰官婆羅門婦女身得度者卽現婦女身
而爲說法應以童男童女身得度者卽現童男童女
身而爲說法應以天龍夜叉乾闥婆阿脩羅迦樓羅

緊那羅摩睺羅伽人非人等身得度者卽皆現之而
爲說法應以執金剛神得度者卽現執金剛神而爲
說法無盡意是觀世音菩薩成就如是功德以種種
形遊諸國土度脫衆生是故汝等應當一心供養觀
世音菩薩是觀世音菩薩摩訶薩於怖畏急難之中
能施無畏是故此娑婆世界皆號之爲施無畏者無
盡意菩薩白佛言世尊我今當供養觀世音菩薩卽
解頸衆寶珠瓔珞價直百千兩金而以與之作是言
仁者受此法施珍寶瓔珞時觀世音菩薩不肯受之
無盡意復白觀世音菩薩言仁者愍我等故受此瓔

珞爾時佛告觀世音菩薩當愍此無盡意菩薩及四
衆天龍夜叉乾闥婆阿脩羅迦樓羅緊那羅摩睺羅
伽人非人等故受是瓔珞卽時觀世音菩薩愍諸四
衆及於天龍人非人等受其瓔珞分作二分一分奉
釋迦牟尼佛一分奉多寶佛塔無盡意觀世音菩薩
有如是自在神力遊於娑婆世界爾時無盡意菩薩
以偈問曰

世尊妙相具 我今重問彼 佛子何因緣
名爲觀世音 具足妙相尊 偈答無盡意
汝聽觀音行 善應諸方所 弘誓深如海

歷劫不思議	侍多千億佛	發大清淨願
我爲汝略說	聞名及見身	心念不空過
能滅諸有苦	假使興害意	推落大火坑
念彼觀音力	火坑變成池	或漂流巨海
龍魚諸鬼難	念彼觀音力	波浪不能沒
或在須彌峯	爲人所推墮	念彼觀音力
如日虚空住	或被惡人逐	墮落金剛山
念彼觀音力	不能損一毛	或值怨賊繞
各執刀加害	念彼觀音力	咸卽起慈心
或遭王難苦	臨刑欲壽終	念彼觀音力

刀尋段段壞 或因禁枷鎖 手足被杻械
念彼觀音力 釋然得解脫 呪詛諸毒藥
所欲害身者 念彼觀音力 還著於本人
或遇惡羅刹 毒龍諸鬼等 念彼觀音力
時悉不敢害 若惡獸圍繞 利牙爪可怖
念彼觀音力 疾走無邊方 蚯蚓及蝮蠍
氣毒煙火然 念彼觀音力 尋聲自迴去
雲雷鼓掣電 降雹澍大雨 念彼觀音力
應時得消散 衆生被困厄 無量苦逼身
觀音妙智力 能救世間苦 具足神通力

廣修智方便 十方諸國土 無刹不現身
種種諸惡趣 地獄鬼畜生 生老病死苦
以漸悉令滅 真觀清淨觀 廣大智慧觀
悲觀及慈觀 常願常瞻仰 無垢清淨光
慧日破諸闇 能伏災風火 普明照世間
悲體戒雷震 慈意妙大雲 澍甘露法雨
滅除煩惱燄 諍訟經官處 怖畏軍陣中
念彼觀音力 衆怨悉退散 妙音觀世音
梵音海潮音 勝彼世間音 是故須常念
念念勿生疑 觀世音淨聖 於苦惱死厄

能為作依怙 具一切功德 慈眼視衆生

福聚海無量 是故應頂禮

爾時持地菩薩即從座起前白佛言世尊若有衆生
聞是觀世音菩薩品自在之業普門示現神通力者
當知是人功德不少佛說是普門品時衆中八萬四
千衆生皆發無等等阿耨多羅三藐三菩提心
少法蓮華經觀世音菩薩普門品經

音釋

御製序

爍迦羅

梵語也此云堅固樂式灼切

芑

毗義切

剋

許容切

敵帚

敵毗祭切敗也 餽於餽切 帚之九切簞也 餽於餽切



丹陽居士賀學易施資刻此
妙法蓮華經觀世音菩薩普門品經
嘉禾釋
道梅對 長洲徐普書 建陽鄒友刻
萬曆戊戌冬十月徑山寂照庵識

如法通華經世音菩薩品高給

十一

十一

佛說大六念十八野山家無執經
佛說大六念十八野山家無執經
佛說大六念十八野山家無執經
佛說大六念十八野山家無執經
佛說大六念十八野山家無執經

首經

佛說大六念十八野山家無執經
佛說大六念十八野山家無執經
佛說大六念十八野山家無執經
佛說大六念十八野山家無執經
佛說大六念十八野山家無執經

八、
四十五